

南皮張宮保政書

一函
六冊

奏議初編卷五

奏懇續假摺

奏爲恭謝

天恩仍懇

賞假仰祈

聖鑒事竊以病軀不支難勝疆事於上年十二月具

奏懇

恩准予開缺回籍調理本年二月十七日差弁回粵齋回原摺後開軍機大臣奉

旨著賞假一月毋庸

開缺欽此跪聆之下感悚莫名當卽一面經理職守一面設法調治冀得就痊無如經月以來政務之繁愈甚舉凡規畫籌後督察盜案部署匪鄉裁汰諸軍綜節庫款核催園工籌畫沙田懲勸將吏料理一切交涉事宜千條萬緒紛至沓來無一非棘手之事無一有可循之例加以瘡習太重曲折太多急之則勢緩之則玩每有一事無不煩屢次之文牘語言然人才止有此數又不便操之過急而廣東撫臣適在假中臣督率司道鎮將各官籌思經營並會商東西兩撫臣辦理其接見僚屬鈎考案牘仍復夜以繼日寢饋不遑並無片刻休息之時故轉瞬一個月病體仍未輕減惟聞各省疆臣引病者較多未敢遽行瀆請惟有仰懇 天恩再予賞假一個月俾得加意醫治其地方政務仍當力疾辦理俟屆時揣度精力是否尙能支持再當據實上請所有微臣感激下忱叩謝 天恩暨病體未痊懇 恩續假緣由理合恭摺具陳伏乞 皇太后

皇上聖鑒謹

奏

舊案盜犯悉照新例取決片

再臣等因粵省盜風日熾請將各項盜匪無論水陸不分首從罪干斬梟斬決者仍先行就地正法經刑部議准具奏奉 旨依議欽此咨行到粵當卽行司欽遵辦理臣等督同臬司于該縣詳加覆議查各屬劫盜

現經拿獲實屬繫繫者皆係舊案若新出盜案其獲犯與否尙未可知倘將舊案盜犯仍然循舊解勘則

是徒有嚴懲之名並無速辦之實殊不足以資儆惕與此次奏請嚴辦之意仍有未合既經奉 旨允准自

應新舊案一律辦理除已經擬定罪名 題咨到部者仍聽候部覆外此外無論新案舊案已獲犯未獲犯已

招解未招解現卽概照此次 奏准章程一律先行正法彙奏以收懲暴安民之效據臬司議詳前來除批行

通飭外理合附片 奏明伏乞 聖鑒謹 奏

會奏查明稅項改革除弊摺

奏爲查明廣東肇慶潮州兩府徵收稅項尙無收規入私情事現擬將肇慶稅廠改革除弊以恤商民並令兩廠各解額外節省銀兩以充海防經費恭摺陳仰祈 聖鑒事竊臣等承准軍機大臣字寄光緒十年七

月二十六日奉 上諭有人片奏肇慶府黃岡稅廠吏書巡役皆以厚資謀充該府收受規費等因欽此當

經臣等行司逐一認真查辦因防務倥急委員往查久無確切情節駁令覆查並因案牽涉前任藩司添委肇

陽縣道潘駿猷查覆又先後密委候補道李壽 奏留差遣河南候補道朱壽鏞山西偵探委員直隸州知州

陳占鰲通判徐敦詒降補知縣楊光銓鹽大使周志端迭赴肇潮兩府分別密加訪查互相印證密札藩臬兩

司查核議擬茲據署布政使蕭韶按察使于蔭霖署督糧道李蕊肇陽羅道潘駿猷河南候補道朱壽鏞會同稟覆前來臣等參考覆核詳加酌定查原奏內稱肇慶黃岡稅廠每年收稅十餘萬兩報解者祇三萬餘兩各節查黃岡稅廠卽黃江稅廠只徵西下水貨物從前徵收稅餉遞年約銀八九萬兩不等並無收至十餘萬兩之多而每年應解正稅銀一萬二千八百兩院司養廉三百八十餘兩羨餘銀一萬五千九百五十兩片

奏加徵盈餘銀二萬兩橋羨銀一萬兩共銀五萬九千餘兩有闕之年加增羨餘銀一千七百餘兩共銀六萬九百餘兩卽從前加增盈餘橋羨兩項止六成已不止報解三萬餘兩之數且尚有該廠緝私勇餉簿夫工食賞犒平水火耗解費等項費用並有肇慶端溪書院經費肇慶綠營操演山梁費向厘卡巡丁口糧分攤科場經費歲脩景福園帑費皆出自該廠稅餘此等多年舊案爲數實屬不資該府紹榮到任後嚴懲包攬募勇巡緝所用查廠之人復能誠實出力以故日有起色光緒十一年收至十萬餘兩原額內有片 奏加徵盈餘銀

二萬兩橋羨銀一萬兩係嘉慶年間增加自咸豐元年粵匪滋事正稅短絀加徵盈餘及橋羨銀兩向多不報解至四成同治八年加至六成光緒九年升任藩司剛毅飭令解足十成俟一年以後察看情形再行稟辦亦經該府遵辦是該府已將正餘解足並非止解三萬餘兩又原奏內稱若所謂黑錢辦用錢包攬錢乃額外剋剝商人者並有入櫃錢乃署役侵蝕正稅者尙不在內各節查黑錢一項係簽子手勾通商人少報實稅所得名曰黑錢此無定款亦無定數此項卽一名入櫃款也包攬一項乃無業地棍熟識書役巡丁扛攬納稅名曰

包攬係從中取利亦無定數此兩項本爲該府所力禁者甚不致任聽侵蝕正稅惟辦用錢一項實爲累商藥材雜貨按稅每兩收三四錢至五六錢不等木料茶葉每兩七錢柴炭每兩多至一兩四錢此廠書役所得者每年共約收銀九萬餘兩又有原奏未及之官厘頭一項按稅每兩抽三四厘至七八厘一分不等此官房幕友及總房散房家丁所得者每年共約銀五千餘兩又有原奏未及之船頭錢一項米船每隻一千三百文穀船六百墟艇錢一項分大中小號各數百不等此兩項係充官廠雜用者每年共約銀五六千兩又該廠徵稅係收洋銀內有彌補平餘火耗解費銀兩名曰三大平餘該廠書於應補平水各項之處有額外加平一錢四分至二錢六分三錢一分不等此廠書所得者亦原奏所未及每年共約銀一萬七八千兩以上各項痛弊相沿由來已久數目散碎難稽商賈亦不深明其故紹榮到任以來並無該廠徵收上控之案該府雖未能摘發杜絕尙不至有心庇護又原奏內稱黃江廠書吏巡攔皆費厚資承充該府既受多金不得不代爲庇護聞從前書役承充五年先納規禮銀五萬元前年冬間朱姓承充加至八萬五千元而每年節禮約四千兩廠費約五千兩尙不在內巡役則每名值千兩係私相授受官祇收堂禮百金各節查該廠書吏照例五年充補一次現在書吏朱安係於光緒九年九月內奉札供役其巡攔人役六名簽子手額設四十名向來陋習書巡於承充之時有繳納規費之事其規費係合廠書巡統核朋湊合計充規並幕友家丁司道府縣房費及一切雜費共須六七八萬元不等並非廠書一人卽納此巨款至節禮堂禮向來亦有此名目大率各項收受與否視乎

官之貪廉並無一定又該廠向有鑪規火燭兩項均由廠書按日供備非官所得合計通年所費甚鉅尙不止原奏廠費之數原奏所謂廠費並無其名當係卽指此項肇慶府知府紹榮素行尙屬謹飭查無收受各項規禮之事又原奏內稱該府每年解藩署陋規三千兩前藩司剛毅不肯收受飭令解足溢額銀一萬兩充公該府勉強試辦敷衍塞責各節查該府早年聞有每年解繳藩司季規銀三千六百兩近已停止多年若值承充之年尙有廠書繳納藩署規費三千兩之事收否亦無一定視乎藩司惟事須數年一週升任藩司剛毅在粵日適值關書承充未收此項令該府將加徵盈餘橋羨兩項照額完解其光緒九年分之項該府卽已遵解似無數衍塞責情節龔易圖在藩司任內未值承充其並無規費自不待言綜而論之黃江一廠存餘各項僅銀六萬兩左右該府照額完解外以之開支各項公用尙屬從容而書巡浮收勒索至逾正稅一倍實爲有累商民其中尤以充規爲百弊之根每遇廠書將滿之年各色吏胥商民集股謀充視如置產其爲賤商蠹稅勢有必至理有固然今欲兼收利國利民之益必宜斷以拔本塞源之計故欲去浮勒非盡革書巡之充規廠費各項規禮不可欲除規費非盡除廠書巡攔名目年限不可欲免謀充索費尤非改革另設委員承辦不可不然雖使裁規革費書吏必仍盤踞把持別立勒索名目甚至串攬漏稅該府必仍不免上司之誅求種種之浮費誠恐仍將襲舊收規聽其滋弊且該廠距府城三十里該府不能親往稽察但委之幕友家丁斷不能遠悉商情挾發吏弊溯查同治五年前廣東撫臣蔣益澧奏改太平關章程委員試辦革除書吏各項人役名目使費

至今宿弊一清自應仿照辦理擬請將黃江稅廠以後改委府廳一員前往試辦駐廠稽徵將廠書簽子名目裁除改用司事准募巡丁可以隨時更換責革不准幕友家丁干預稅務並不准有官房總房散房名目並給三聯印票分別存發報查按月開報將所有每年商民之額外加平辦用錢官厘頭船頭錢墟艇錢黑錢包攬錢共七項概行禁革至該廠向有花押小票錢每貨船一隻銀一錢卽梧關之紅單錢差艇看船錢每船一百文挂號錢每船一百文收旗錢每船三十文均係下水此數項略與梧關同爲數甚微以資散役差艇雜用應准均仍其舊敢有別立名目違章私收者從嚴懲辦其出自該廠書吏之充規一併概行禁革違者與受一律從嚴參處並將裁革核定數目章程榜示該廠十里內外勒石水陸通衢商民共見永遠遵行其所收稅項除原有之正稅羨餘片 奏加徵盈餘橋羨四項務令照額解足外其餘悉數歸公儘數解省至該廠簿夫司事巡丁薪工賞犒撥船陸勇口糧等項所需實繁擬按稅項之數酌提一成以爲廠用惟肇慶向有端溪書院經費緣營操演山梁經費向厘卡巡兵口糧分攤科場經費歲修景福圍帶費碍難刪除且該府及肇陽羅道辦公無資亦應仿照太平關章程籌給公費均於向有之三六平餘項下分別撥節勻撥支給不得傷及稅款通計此後商賈過肇慶者每年可省銀十二萬餘兩除稅廠改歸委員試辦候 旨遵行外現已先飭將各項

浮收各種規費一律卽日裁除此案原查委員山西直隸州知州陳占慈籍隸潮州府悉本省商情又無官場惡習迭次委查諸弊均能自任勞怨得以纖悉無遺現卽委令前往暫行幫辦以免書吏把持違抗久擾商民

以後如委辦之員果能稽徵有效較之舊額正稅羨餘加徵盈餘橋羨四項原數加至一倍擬劃奏懇 恩

施照異常勞績給予獎勵此肇慶黃江稅廠週年盈絀現在定章整飭積弊之實在情形也又原奏所稱張聯桂前在潮州府任內將東關稅厘減輕以致洋紗煙絲悉由汕頭來往東關輪納一節查潮州府東關祇徵落地雜稅並不抽厘至洋紗販自外洋煙絲產自福建永定等縣汕頭未開口岸之先洋紗係由省城汴東江而上至惠州府龍川縣屬之老隆司水陸並運分抵潮州府屬揭陽縣嘉應州屬各縣銷售煙絲出產之處本與潮州府城一水相通從前商販或順流徑下過府關抵汕頭由海道分運各處或中途卽折入嘉應州境汴流至長樂縣陸運越歧嶺以達老隆司換船沿東江而下趨省會其時東江之白沙地方尙未設有厘廠迨去厘廠既設汕頭口岸亦開華洋貨運四通八達於洋紗之專銷於潮惠嘉兩屬者煙絲之不專銷於廣東省城者大抵由汕頭口出入經過潮州東關同治九年潮州府知府何慶齡稟經督臣瑞麟批准東關完稅照則稽徵蓋洋紗一項昔則東江有水陸並運之煩今則汕頭有一簣可杭之便煙絲一項昔則踰嶺入江而祇注粵省一處今則順流出口而分售沿海各區難易固殊趨避自審所有洋紗煙絲兩項經由東關非因減輕稅項而然張聯桂前在潮州府任內委無減則徵收之事又原奏內稱東關餉有定額添收洋紗煙絲兩項則祇入私囊一節查潮州府徵收商稅每年應解正額銀六千九百四十二兩稅羨餘銀一萬二千三百五十九兩商稅部飯銀二千七百八十四兩火耗銀二百零八兩加增盈餘銀二萬兩有閩之年加增稅羨銀一千三百七十

九兩部費銀二百九十兩共銀四萬三千八百餘兩加以補足洋銀平水解費需銀五萬餘兩又該廠各卡勇糧工食紙燭賞犒之費每年需銀一萬餘兩此外地方公用爲數甚多該府歷係遵則徵收照數完解查潮州東關收稅舊以茶葉白麻魚紙爲大宗近十餘年來茶麻無復徵收魚紙日形短絀綢緞概行透漏各項廣貨報稅者亦甚稀少茶麻等項短收之稅專賴花紗銷路較廣以補之大率遞年徵收銀八九萬餘兩不等較之三年以前所增無多較之嘉慶道光年間沙船盛行厘金未設民豐稅旺之時則遠有未逮張聯桂去任後近年潮關情形大致相同至該廠向無朋充鉅規及辦用等項與肇慶不同應仍照舊章辦理此潮州府東關稅項本關互有盈絀無關弊竇之實在情形也臣等覆查肇慶稅廠之旺由於近年桂境商賈流通紹榮稽徵得法而然地方公用取給該廠稅餘者甚多潮州稅廠之旺由於花紗煙絲乘輪改道所致又須抵補他項短收肇慶府年額解銀六萬兩潮州府年額解銀四萬三千餘兩其餘除彌補平水火耗項費外以解廠用及地方公用之需計肇慶於正額外已加羨餘又增加徵盈餘又加橋羨較之舊制已加解三次潮廠於正額外已加商稅羨餘又加盈餘較之舊制已加解兩次竊思關稅一項原有定額果其報解無虧即使略有餘饒亦爲法之所不禁此等羨外之羨餘外之餘留爲地方及本屬辦公原可率循其舊第粵省現當庫儲匱乏防務孔艱將雜項公用逐一撙節津補防需未始非以公濟公之法查肇慶府向解之加徵盈餘橋羨二項共三萬兩合計歷年實解六成尙短銀一萬二千兩自升任藩司剛毅任內始令全解然原詳僅令試解一年再行察看情

形亦非定案今擬改章委員常年將此一萬二千兩解足其光緒十年十一年之加徵盈餘各二萬橋羨各一萬均已飭照數接續解足至原額正餘四項以外以有所餘悉數歸公此係將向來各項地方公用改支他款並將該府用度極力裁省騰挪而出每年儘數解省約可於額外解銀三萬兩內外以充海防經費飭潮州府將該關一切公用自行設法撙節竭力稽徵自光緒十二年春季爲始每年於額外解銀二萬兩以充海防經費合計此兩項共約銀五萬兩應併名爲額外節省防費每年按四季批解書後局專爲充支海防經費無論何事不得挪用定以十年爲限十年之內不得無故輒請減免十年之後如果商貨銷路實有變遷再當體察情形能否定額奏明辦理一面嚴飭肇慶府暨幫辦委員遵照裁定新章辦理盡革規費嚴懲索擾並飭潮州府不得因會解節省費於例外多徵病商似可分別辦理兩廠增解之數固於防費可稍資貼補而肇慶改章永除苛斂顯以蘇息商賈卽隱以保全正項稅厘尤爲目前要務湖北荆宜施道前潮州府知府張聯桂查無減收入私情事應請毋庸置議肇慶府知府紹榮經徵黃江廠稅業已遵解足額查無收規庇護情事其於該廠書巡多取累商未能飭查禁絕本屬不合惟積弊相沿非止一任且現擬改章委員試辦應予從寬請

旨將該府紹榮革職仍留本任以觀後效肇陽羅道潘駿猷近在同城未能覺察亦有不合惟此次查出各弊係該道會同訪查稟聞尙與始終含糊者有間自應一併從寬請 旨將潘駿猷交部察議仍責成該道以

後將肇慶稅廠實力督察力杜弊端所有查明肇潮二府稅項尙無收規入私情事現將肇慶稅廠改章恤商

請將該府道分別做處併令兩廡增解額外節省防費銀兩緣由謹合詞恭摺覆陳伏乞

皇太后

皇上聖鑒訓示再此兩案因屢次駁查派員密訪詳核章程是以覆奏較遲合併聲明謹 奏

學臣出缺請 旨簡放摺

奏為學臣因病出缺請

旨迅賜簡放恭摺馳陳仰祈

聖鑒事竊據羅定直隸州知州杜庭璆稟稱廣

東學政胡瑞瀾於本年四月初一日按試到州已患氣喘腹瀉照常校閱積患辛勞至是月十四日試竣十五日力疾就道赴連州詎料開船行未十里忽轉痰症醫藥罔效卽於是日酉刻因病出缺據該學政家丁稟報經該州會督同在城文武將身後事宜妥為照料委員將學政關防齎送赴省等因前來臣等伏查學臣胡瑞瀾前曾督學粵東清勤夙著上年銜 命復莅此邦正承惠州一案物議紛紜之後先聲所至士氣已伸到

粵後以沿途勞頓卽患氣喘按試肇慶羅定兩棚關防嚴密考校公明場內監試督察必躬必親摘發搶替弊端評牘文字高下力疾從事不肯稍加休息真才振奮衆論翕然實為粵省士林之幸乃以抱疚勤勞遽至不起深堪惋惜應俟棺槨到省由地方官接送回湖北原籍所有廣東學政一缺相應請 旨迅賜簡放以重

學校查各省學政遇有事故例由督撫暫行署理又雍正十二年乾隆二十四年先後議准學政離任將印信交巡撫代理歷經辦有成效茲學臣胡瑞瀾出缺該衙門逐日均有應辦公事臣等公同商酌卽由臣文蔚循例暫行兼理至本年連州等處歲試尚未舉行應俟新任學臣到日再行補考除兼理接任日期由臣文蔚另

疏題報並咨部外謹合詞由驛具陳伏乞

皇太后

皇上聖鑒訓示謹奏

會奏查明據實覆陳摺

奏爲查明廣西梧州關經費病商過甚應即免抽並裁禁各項浮收規費以恤商保餉暨嚴禁書吏整頓厘務清理訟獄各節據實覆陳仰祈 聖鑒事竊臣之洞於光緒十年六月承准軍機大臣字寄閏五月初七日奉

上諭有人奏廣西梧州關稅加費過多請飭永遠全裁等語又有人奏廣西積弊太深亟宜剔除一摺等因欽此當經臣之洞咨會前廣西撫臣潘鼎新據實查明會奏迭此札飭西布按二司會查各在案潘鼎新迄無一字咨覆西兩司覆稱潘鼎新於光緒十年奏明梧州關公費解交省局久未准抄摺咨會臣秉衡在臬司任內以粵事緊急奉 旨駐龍辦理後路事宜旋蒙 恩命暫護撫篆又奉光緒十一年六月十八日

上諭張耀奏廣西被水成災擬籌賑款一摺等因欽此經臣秉衡先後提充賑款一面恭錄轉行署廣西布政司慶愛署接察使沈康保查辦其梧州一案經臣等迭次委員密訪西省委知府黃宏藻稟東省委直隸州知州陳占鰲通判徐敦詒降補知縣楊銓光鹽大使周志端從九品張祖恩先後分別密查並會委奏留差遣河南候補道朱壽容覆加確查會同西藩臬兩司核議稟覆去後茲據覆料查原奏內稱梧州府關稅自咸豐七年後加抽經費爲招集鄉勇保衛地方起見凡往來貨物於正稅銀一兩外加抽銀一兩每年合計約加抽銀四五十萬兩均收銀而不給票肆意侵漁無從查考加徵過多請飭永遠全裁一節查梧州加抽經費實係咸豐

初年艇匪土匪肆擾前任梧州府知府陳瑞之募勇剿捕經費無出集商籌議按貨抽捐以供勇費竟有稅費相等者有費多於稅者嗣後賊平勇少而經費如故商人屢以爲言乃減去舊數之半先設分局十二處陸續裁撤光緒六年復將水隻分局裁去或由粵東會館經費局抽收或由水旱兩關帶抽茲經委員改裝易服前往向來往商民分投密訪或伴作商賈赴關納稅或潛搭貨船觀其收費並傳訊該局司總梁寶琛等暨平福館商董東茂興公昌聚豐信全昌等調集水旱關各帳簿暨書巡等私簿互相參核計該府每年所收經費約銀十萬兩有奇實無三十萬至五十萬之多該州自兵燹後正稅未能足額即以經費撥補又廣西巡撫藩臬鹽道衙門辦公不敷歷年於梧關經費項下撥解公費此款早年出自稅餘後因兵興稅絀改在經費內動支從前係每年三萬兩此外雖有節壽之說收與不收視乎上司光緒十年減爲二萬二千兩裁去節壽餘作該府路勇兩營及護關扒船之餉費惟查歷年經費之數官收雖不過十萬有奇而商人所費實不止此更胥巡役家丁地棍船戶浮收包吞皆所不免雖無檔冊可稽追出書巡分銀底帳及船戶木商充經費底簿按月核計全數約略可知約計每年大率收銀十七萬兩實爲商民巨累此外尚有因頭一款爲原奏所未言及此款係由書吏算船估稅而起定例權算米數豆麥各船之法以長一丈廣一丈深五尺爲五因一因五千斤五因共作二萬五千斤他貨二三因至七八因不等皆有定則書吏欺愚商賈如米則謂例應七因今私讓爲六因應納使費若干故曰因頭商人懇囑關吏不令報足十成甘於稅外私納規費名爲讓減一因實已暗增一因

先則商人利其隱漏繼則關吏踵事多求既屬病商亦兼蠹稅計暗加因數每年約銀二萬兩私得因頭每年約銀五萬兩係書巡幕丁所得又有外費一款係書巡府差人等所得每年約銀六千餘兩又有現費一款乃上下水零星雜貨物若釘瓦挂碎爆竹彩錢筆竹木梢等款皆例不收稅之物係查船巡丁所得每年約銀五千兩又有柴火銀一款乃無稅無費之物每柴一束收錢一文係充該廠日用每年約銀一萬三千兩合而計之正稅尙屬有限而商賈於正稅之外所費至二十餘萬商民怨苦實不能堪羣蠹縱橫人思染指情弊之深至斯而極查該廠經書七名算房七名銀房十名卽官銀匠巡役四十四名內正總四名亦稱簽子手亦稱尺手書巡皆五年一換經書算房銀房及正總更換時各納充費一千兩上下不等此條最爲諸弊之根查梧州一區既有例設稅廠又有厘金總局又有經費局一日之內三次檯徵百金之貨完至什一實爲病商苛政且經費局商民費至二十餘萬兩國家並不能用其分文尤出情理之外況徵斂愈重商賈愈困趨避走漏勾串影射愈多西省稅厘大局將不可問自應將經費一項卽行裁免抽收以蘇疲商而保正餉並將該府所募勇丁兩營全數裁撤以節糜費由西省另派防營駐梧巡查彈壓令該府於經收正稅自行竭力稽徵不得藉口缺額別圖彌補從前該廠徵解稅項係前後遞推牽搭淡旺不均或淡月而所解極多或旺月而所解甚少應改令按照定額計日攤解以免藉口賠累此後該廠徵稅俱按定則估算不准浮加一因其餘吏役私收之因頭分費規費等項一律嚴除永免商累並刊給三聯印票分別存發報查其廠書巡役充規概行禁革惟根

請不除弊端決不能斷應將廠書算房銀房簽子手尺手等名目年限一概革除廠中查船核算繕寫記簿俱改用司事簽手尺手改募巡丁既無報部額缺充滿年限即可隨時另募隨時革換庶可杜賄充禁索之弊惟向來各項人等仰給此廠者不下數百家此次裁除太鉅若不酌籌飯銀限一定數必致另開需索刁難之弊防不勝防甚至包串漏越轉虧正款擬令按正稅之數每兩止許收飯銀五公分給司事巡丁一切人等統在其內不准多取分毫亦不准別立名目查梧州厘局向有商捐三江緝捕一項及鹽包小厘一項以養護商扒船每兩五分每年約銀一萬二千兩現經臣秉衡飭將此項緝捕委員勇役扒船概行裁撤另派水師扒船巡護緝捕鹽包捐項概行免交計以此項抵稅廠飯銀之處每年商民尚可少納銀七千餘兩此外貨船一隻有紅單銀一錢有挂號錢上水一百文下水二百文有收旗錢三十文皆散役差艇所得為數甚微應准均仍其舊又查上項所開柴火銀一項銷路甚廣取之甚微積之甚鉅無稅無費尚不致為商民之累此項一萬三千兩即遵 旨提充公用查西省鄉關經費例銷止一千九百餘兩不敷甚鉅向係由各州縣派捐銀一萬四千餘兩其餘由外籌補各屬瘠苦難支應即於此項內按年提銀七千兩解存司庫備支科場經費以後各州縣應辦費立案永遠免派至舊日院司道公費二萬二千兩原係辦公之需臣秉衡及司道等均未提作私用惟現既停抽經費不宜累及該府惟有極力撙節擬裁減一萬六千兩即以柴火銀餘款六千兩分季解交善後局充巡撫藩臬鹽道各衙門辦公之需並將此次裁革減定各項數目榜示該廠十里內外並

勒碑水陸通衢人人共見永遠遵行計稅費均按例定因法徵收一項裁減約二萬兩經費一項官私裁除約十七萬兩因頭一項裁除約五萬兩外費現費兩項裁除約共一萬二千兩緝捕簿捐款鹽包小懲兩項除抵充飯銀外裁減約千餘兩通計此後商賈過梧關者每年約可省銀二十五萬兩若有浮收勒索逾於定章之外者被人告發或經查出嚴行參辦並嚴禁梧州府永遠不准餽送上司節壽如有私送私收者與受均一律參處又原參內稱廣西藩司衙門有吏一房吏二房向係廣東肇慶府黃姓充當而作弊惟吏一房尤甚盤踞日久視缺分之肥瘠索取規費一節查廣西正佐各缺原有詳定輪委酌委者隨時稟由臣秉衡酌定始行懸牌詳委傳到各員面給委札不經書吏之手官場並無閒言似無延擱索規之弊至補缺本有定例無論酌補輪補之缺均詳由臣秉衡悉心核定分別題奏辦理官員繳憑例應於到任後扣明程限有無逾違具結列批送司按季彙繳其間有聲扣外錯駁查更正以致稽延亦事之所有並無半年後始行繳憑之事藩署吏一房書吏前藩司張夢元於到任時查閱卯冊見係黃姓居多且籍多肇慶者業已分別更換吏二房書吏查無黃姓之人署藩司慶愛隨時訪查各書尙無弊竇其有承充年滿者概行撤換一有弊端立予革究又原奏內稱廣西整金各卡自桂林順流而下省垣上下關兩卡陽朔縣城一卡平樂府城一卡昭平縣城一卡梧州府城三卡自梧州府城溯流而上則至藤縣一卡濠江一卡平南縣之白馬塘一卡大烏墟一卡桂平縣之大陸江城一卡潯州府城兩卡又自潯州府分南北河溯流而上其南河則橫州之南鄉墟一卡永濟縣城一卡南甯

府城三卡宣化縣之三河口一卡右江平馬墟一卡百色城一卡其北河則至武宣縣屬之濶水河一卡柳州府城兩卡融縣長安墟一卡古宜墟一卡慶遠府之懷遠鎮一卡皆大河船隻所常經其餘窮鄉僻壤私設之卡尙難盡悉各卡有督辦有幫辦有委員司事有尺手巡丁除耗費侵漁外報解不過十中一二餘削商民應於府城釐設釐卡酌量裁併其外卡除擇要者酌留一二處其餘槩行刪汰一節查廣西地瘠山多舟楫可通之處乃有商賈聚集是以開設釐卡皆在濱河口岸而四境多與雲貴廣東湖南等地連界支河歧出並無扼要總口堪以歸併抽釐不得不於桂平梧州南甯百色柳州慶遠等府屬沿河市鎮設立正分各卡或管抽收或司查驗設卡之數雖似較繁實因杜絕漏漚並非節節重徵蓋西省釐金章程凡商民國貨發行時抽落地釐金一次販運貨物由隣省入境者抽入境釐金一次由本省運赴隣省者抽出境釐金一次無論落地入境出境均止抽收一次經過各卡驗票放行槩不重抽辦理多年歷久相安水陸設卡之外陸路祇泗城府屬汪甸卡一處稽查滇省繞道入粵之貨其餘僻遠之區實無一卡歷來設卡之所必先詳由撫臣批示大張曉諭方無抗違更不能任意私設至各卡有督辦幫辦委員司巡等名目則係量釐物之繁簡分別酌派其應支薪水經費向有定章不能任聽虛耗歷經查察整頓將行爲卑陋聲名平常之試用縣丞蔣錫熊吳桂森從九品尹鑑典史葛森徐溥試用通判程鏡先後參革並將開報含混之通判陶用中加平漁利之司事丁憂湖北巡檢孫新原卽孫傳裘參革究辦在案近年釐數每年總在六七十萬之間廣西貧瘠省分貨少商稀抽數尙不